

**Date – 12/09/2026**

**Time - 18:30 -18:40Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES (EVENING)**

1. Nimina state chhunga ruah nasa tak sur avangin mi 2 an thi.
2. Bairabi leh Jamira inkar rel kawng chu siam zawh a ni a, naktuk atangin rel pawh tlan tir nghal tum a ni.
3. India President-na hnuaiah vawiin atang khan BRICS Summit vawi 18-na chu New Delhi-ah tan a ni.
4. Prime Minister Narendra Modia chuan BRICS chuan kum 20 kalta chhungin khawvel hmuhah a nihna Chiang takin a pholang tawh a ti.

<><><>

**RAIN HAVOC**

Nimina state chhunga ruah nasa tak sur avangin mi 2 an thi.

Nimin tlai dar 5 vela ruah nasa tak sur avanga tui luankawr a tuihawk chaktak chuan Lawngtlai College Veng a mi, Ruby Lalrinsiami kum 6 chu metre 300 vel a len a, a thi a ni.

Ruby Lalrinsiami kum 6 leh a thiannu Alicya Remruatkimi te chu an thenawm hnaia Dawrah thil lei turin an kal a, kawngsir a Tuihawk luankawr, tui chak taka luangah Ruby i chuan a ke a zuk chiah chu tuihawk chuan a la ta a, a thiannu chuan umzui mahse tui a chak avangin a umpha lova, in lama Ruby pa hrilhin, Ruby Pa Pu Lalbawlliana leh a thianpa chuan theihtawpa umzuiin, tuiluankawr mumal lohna leh hnimin a bawh vek hmun chu mihring tana kalna chi anih loh avangin an hel a, Ruby ruang chu lengkir hnuai tuitlingah an zuk hmu ta ani.

Ruby Lalrinsiami hi Alpha English Medium, College Veng.Lawngtlaiah Kg 2 zirlai ani a, vawiin hian a ruang hi District Hospitalah endik a ni a, College Veng thlanmualah vuiliam ani.

Tukin zing dar 5 vel khan Vairengte Zalen Veng a cheng Pu Ngamlalliana leh a fapa Lalramneiha te chenna in chu leimin in hnawl in Pu Lalramneiha fapa Zodinglana kum 14 mi chu a thi a ni.

Leimin hian chenna in pahnih hnawlin Pu Ngamlallian a te chenna hi concrete building niin a hnuaiah hian a fapa Pu Lalramneiha te chhungkua an cheng a, chhungkaw member 8 an awm a, a bul chiah assam type in nen leimin hian a hnawl ani.

Zodinglana ruang hi tukin dar 7 vel khan inchim kar atanga lakchhuah niin a pu Pu HK Lalrohlua in Hermon vengah dah niin vawiin tlai dar 3 hian vui a ni ang.

Zodinglana hi Kolasib Reliance Naupang league khelh meka Rafael Football Academy player niin vawiin a match khelh tur pawh ama pual hian cancel ani.

(Lalnggheta Lawngtlai PTC/ Doreen Vairengte PTC)

<><><>

HEALTH MINISTER

Health Minister Pi Lalrinpuiin Mizoram mipui 5 zinga 1 zelin cancer veina ‘chance’ nei ang hiala chhut a nih tawh thu a sawi.

Nizana North East Chapter of Association of Radiation Oncologist of India Conference a hmanpuinaah he thu hi Minister chuan a sawi a. Health Minister chuan India ramah Mizoram chu a micheng zat a zira Cancer vei tamna ber state a nih avang te, Mizoram mipui 5 zinga 1 zelin cancer veina chance nei ang hiala chhut a nih tawh avangin Cancer lama hmalatu doctor thiam tak tak kalkhawmte chu theihtawp chhuahpui turin a sawm a. Conference an hman chhunga hriatna leh thiamna inzirtir tawn hrang hrangahte pawh Mizoram harsatnate lo hre reng turin a chah bawk a ni.



LOK ADALAT AT SERCHHIP

India ram leh Mizoram hmun dang rualin vawiin khan Serchhip-ah District Legal Services Authority buatsaihin District Court-ah National Lok Adalat buatsaih a ni.

Lok Adalat-ah hian Presiding Officer Pi Josangzeli Tlau kaihhruaiin Conciliator pahnih Pi K. Laldinpuii leh Pu Lalrinhlua te nen thubuai 66 ngaihtuah a ni a. Thubuaite hi pawisa ba, in hmun inchuh, ramri buai leh Bank loan rul tha lo leh thil dangte a ni a. Thubuai 39 chinfel niin, thubuai chin fel hlut zawng hi cheng nuai 53 sing 6, 755 a ni.



**RAIL SERVICE**

Bairabi leh Jamira inkar rel kawng chu siam zawh a ni a, naktuk atangin Guwahati atanga Sairang kal rel chu tlan tir nghal tum a ni.

Northeast Frontier Railway (NFR) Chief Public Relations Officer (CPRO) Kapinjal Kishore Sharma a sawi danin, vawiin tlai dar 4:30 khan rel chu tlan chhin tir a ni a. Naktuk atangin rel pawh tlan tan tir nghal an tum tih sawiin Sairang atanga chhuak lovin, Guwahati atangin Sairangah a rawn tlan phawt anga, Delhi leh Kolkata pawh relkawng te pawh a tahtawla tlan chhoh tir tum a ni.

Hetihlai hian, Silchar leh Sairang kawng erawh a tlan tawh bawk a, rel kawng hi thawh hrang hranga siamin, rel service thenkhatah bul tan phawt a ni a. A hma tiama kal chhovin rel service thin zawng zawngte pawh an tlan kim chhoh theih thuai an beisei tih a sawi bawk.

**Byte of CPRO**

Puan tawh angin Katakhal leh Bairabi section chhunga Assam-a Jamira leh Bairabi inkar rel kawng hi tun thla ni 3 zan khan leitlahniam avangin a chhia a, rel kawng chhia zawh ngam rih loh hi metre 70 bawr vel a ni a. Hei vang hian Mizoram leh Assam inkar rel kawng chu khar niin siamthat hna thawh chhunzawm nghal a ni. Rel kawng khar avang hian khualzin tangkhang eng emaw zat an awm a, Rel-a zin thin mi tam takin harsatna an tawk a ni.



## **NORTH EAST INDIA REGIONAL BISHOPS' COUNCIL**

North East India Regional Bishops' Council (NEIRBC) chuan Manipura hnam intihbuaina kal zel chu an dem thu leh mipuite an tawrhpuir thu an sawi.

India hmarchhaka Catholic Diocese 15-a Catholic Bishop-te, Shillong-a Archbishop's House-a kar kalta chhunga an kumtin inhmuhkhawmnaa an thu ngaihtuahah he thu hi sawiin Manipur buaina avangin nunna chan tam tak an awm thu leh chhungkaw tam tak mahni in leh lo tlansan an awm thu an sawi a. Biak In tam tak tihchhiat a nih thu sawiin lungawilohna ch, eng ang pawh ni se, tharum thawhnate, rawng taka in inhalsakna leh social media hmanga huatna tuhna hian tun harsatna chu engtinmah a chingfel thei lo dawn lo tih an sawi a. Kristian an nih angin hrehawmna chu ngawi rengin an thlir liam mai thei lo tih an sawi a.

North East India Regional Bishops' Council chuan hmun tina tharum thawhna thleng chu a mi mal angin emaw pawl ang pawhin ni se an dem tlat tih sawiin Manipur mipuite zawng zawng hnenah pawh, a ti punlun zawng a tawngkam thlahte, thu puarpawheng thehdarhte, tharum thawhna leh phuba lakna hrang hrang te titawp turin an ngen tak meuh tih an sawi a. Hruaitu zawng zawng te, State leh Central Sorkar-te pawhin remna tluangtling a awm theih nan tihtakzeta inbiakna te, dikna hmachhuan a, inpuibawm turin an sawm tih an sawi bawh a ni.

<><><>

**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



**MPCC**

Mizoram Pradesh Congress Committee Sr. Vice President Pu Lalnunmawia Chuaungo chuan sum enkawl chungchangah sorkar lai te hlawhchham dan kawng tam tak a awm tih sawiin sorkar sum/vantlang sum tlak dan rual lo in harsatna a thlen tih a sawi.

Nimina an party political sessionah he thu hi sawiin MPCC Sr. Vice President chuan kum 9 kalta chhunga Mizoram State budget a let aia tama a pung chung a mipui nawlpui kuta sum hman tur a vang ta chuan chhan lianpui a nei tih a sawi a. Chu chu sorkar hrawn mek te'n Economic Policy rintlak an neih loh avang leh sum ruahman leh hman chungchanga a hlawhchham nasat em vang a nih thu a sawi a.

MPCC Sr. Vice President hna lian deuh deuh pheii chu an sum siampui tura an ruat mi tlemte hnenah sorkarin an pe tlut tlut tih sawiin mi tlemte chauh kuta an hman sen loh sum an luhtir tawh tawh laiin mipui nawlpuiin an hman tur sum an kutah a lut lo tih a sawi a. Hetiang taka sorkar sum mipui kuta a tlak rual loh avang hian sum hman sen lohva rut tawh tawh awm bawh mahse mipui nawlpuiin sum hman tur an nei lova, pawisa a vang tih chu dawrkaite auhla a lo ni ta tih a sawi.

Pu Lalnunmawia chuan Health Care (MUHCS) kalpui dik loh avangin Mizoram mipute sum chhiar sen loh vairamah a luang ral tih sawi bawkin, hei hi Mizoram chhunga sum lengvak tlem chhante zinga pakhat a nih thu a sawi a. Tuna ramin a mamawh chu thalai ten an hna hmuh a nih thu sawiin, an thawh theih awm tawh thawh tur an nei lo chu Mizoram mipuite buaina a nih thu a sawi a ni.

Pu Lalnunmawia Chuaungo ho hian vawiin khan Congress Party Thalai te chuan Lal Thanhawla Auditorium, Congress Bhawan-ah "Zirlaite Au Aw" (Chhatroon Ki Goonj ) hun an hmang a ni.

MNF

MNF thalaite chuan sorkarin Lengpui Race Track approach road a ngaihthah avangin hnathawh a thuanawp mek an ti.

Nimina an pawl Vice President Pu Lalnunmawia Pautu leh Mamit bialtu MLA Pu H Lalzirliana hova MSSC REC Motorsports Race Track, Lengpuia siam mêk an tlawhnaah he thu hi an sawi a. Pu H. Lalzirliana chuan MNF sawrkar chuan thalaite tuihalna hriain kum 2022 khan Rural Electrification Corporation (REC) CSR Fund leh SASCI sum tangkawpin North East-a race track hmasa ber ni turin bul a lo tan tih an sawi a. Ram rohlu insiam siak kawngah sawrkar mêk leh sawrkar lo la awm zel turte hi an intlansiak a pawimawh hle tih sawiin thalaite hmakhua chu Zoram enkawltute hian mutmawh hnarmawh neih tur a nih thu a sawi a ni.



## BRICS

India President-na hnuaiah vawiin atang khan BRICS Summit vawi 18-na chu New Delhi-ah tan a ni. Prime Minister Narendra Modia chuan BRICS hruaitu kalkhawmte chu Bharat Mandapam ah a lo lawm a. Hawnna thu sawiin Prime Minister Narendra Modia chuan BRICS chuan kum 20 kalta chhungin khawvel hmuhah a nihna chiang takin a pholang tawh a ti a. Vawiina Summit an neih chu chhinchhiahtlak tak anih thu a sawi a. India in BRICS kaihhruaina hna a thawh chu mipui awn leh mihring chanvo dah pawimawh hmasakah a innghat a ni a ti.

Pu Modia hian khawvel sawrkar inrelbawlina turah roadmap point 10 a tarlang a. United Nations Security Council siamthat chu tikhawtlai theih a ni tawh lo tih sawiin Khawvel chhim lam ramte chu dinhmun pawimawh zawkah an awm a hun tawh a ti bawk.

Puan tawh angina BRICS\_Summit ah hian Russian President Vladimir Putin, Chinese President Xi Jinping, South African President Cyril Ramaphosa, Egyptian President Abdel Fattah El-Sisi, Indonesian President Prabowo Subianto, Iran President Masoud Pezeshkian, Crown Prince of Abu Dhabi Sheikh Khaled bin Mohamed bin Zayed al Nahyan leh ramdang hruaitute a tel a. Member ram Brazil, China, Egypt, Ethiopia, Indonesia, India, Iran, Russia, Saudi Arabia, South Africa, leh UAE an tel bakah Belarus, Bolivia, Cuba, Kazakhstan, Malaysia, Nigeria, Thailand, Uganda, Uzbekistan, leh Vietnam te chu BRICS thawhpui ram an nih angin an tel bawk a ni. BRICS hi atirah BRIC tih hming pu in ram pali intelkhawm Brazil, Russia, India, leh China ten kum 2001 a an din a ni a. South Africa in 2011 ah zawm ve in BRICS tia thlak a ni a. Tun dinhmunah member ram 11 an awm tawh a. Khawvel mihring zaa 49 hi BRICS ramchhungah an cheng a. Khawvel sum dehchhuah GDP zaa 40 hi BRICS ramte thawhchhuah a ni.